

21/09/2025

AKASHVANI AIZAWL

2:30pm

REGIONAL NEWS

SENIOR MEET

Mizoram Synod hnuiaia Pastor bial hrang hrangah te chuan Senior Department inkhawmpui hman mek ani a, Pastor bial thenkhat chuan Senior Meet tiin a hming an phuah ani. Pastor bial thenkhat chuan thu leh hla hmanga intihsiaik nan hun an hmang thin a, bial thenkhat erawh chuan intihsiaik lovin chanvo hrang hrang inruatin inkhawmpui an hmang thin thung a kuminah pawh hman dan chi hnih a awm leh ni a thudawn a ni. Presbyterian kohhran Mizoram Synod hnuiaia Sunday School te hian kar hmasa khan, intermediate leh a hnuai lam chin inkhawmpui an lo hmang tawh a, kumtin September thla hian naupang inkhawmpui hi hman thin a ni a, Pastor bial thenkhatah chuan inkalpawhna kawng tha tawh lo avangin ruah sur loh laia hmang pawh an awm thin ani.

Mizoram Synod Website tarlan danin, Mizoram Synod hnuiaia hian pastor bial 298 a awm a, kohhran 1,139 awmin Sunday School zirtu nuai, 4,44,059 leh zirtirtu 56,815 an awm mek a ni.

<><><>

ARMS SEIZURE

Assam Rifles-in tun hnai khan Champhai district a Myanmar ramri a awm Saikhumphai atangin ralthuam thahnem tak an man.

Assam Rifles thuchhuahin a tarlan danin an thudawn bawhzui-in ramri vengtu Assam Rifles te hian Saikhumphai bul ramngaw chhah tak chu dapin Zirtawpni zing khan ralthuam thahnem tak an hmuchhuak a. An ralthuam hmuh chhuahte hi - Germany siam Heckler & Koch G3 Assault Rifle pakhat, US siam Springfield Sniper Rifle pakhat, 60 mm Mortar Tube pakhat leh rifle chi hrang hrang mu 21 bakah grenade 13 te a ni a. Hei bakah hian bomb tihpuahna Cordtex hrui metre 8, bomb palpuahna hrui trip wire 2, Sniper rifle chungah chhawn chi entlang, Rocket Propelled Grenade (RPG) extender 2, AK-47 assault rifle leh Pistol magazine pakhat ve ve, Radio Set leh antenna 2, antenna dang bakah thildang engemawzat an hmuchhuak a ni.

Assam Rifles hian an ralthuam mante hi Dungtlang Police Station-ah chhui zui turin an hlan a, mihring man erawh an nei lo a ni.

<><><>

METH HAUL

Ruihhlo do beihpui thlak kal zelah Champhai Zotlang-ah Police te'n methamphetamine kg 70 leh gram 200 an man.

Champhai district Police hnen atanga thu dawn danin an thu dawn bawhzui-in Champhai Zotlang-ah hian balu hnuai-ah methamphetamine mum kg 70 leh gram 200 hi an man a. A hlut zawng hi cheng vaibelchhe 9 leh nuai 12 hu ni a chhut a ni a. Hemi a inhnamhnawih ni a puh Lalnunthara (kum 27) Champhai Dinthar veng ami chu Police te hian an man a. Lalnunthara hian he'ng ruihhlole hi Bulfekzawl khua ami Nothanhranga'n a thawn, balu hnuai a thukru tura a hrilh anga thukru a nih thu Police hnenah a sawi a ni. He methamphetamine man hi Police te'n vawi khata an man tam ber paw a ni a. Hriat theih chinah hman deuha Champhai district-ah tho kg 236 an man kha tum khata Mizorama man hnem ber a la ni a hriat a ni.

He tih lai hian Assam Rifles-in Champhai Zote khaw bulah Nilaini kal ta khan methamphetamine kg 34 leh gram 218 an man bawk a. He ruihhlo kengtu erawh chu an man hma-in a ruihhlo hi hnutchhiahin a tlanbo hman niin an thuchhuah chuan a sawi a. Assam Rifles hian methamphetamine man hi Champhai district excise & narcotics department thuneitute kutah an hlan a ni.

<><><>

COVID

Mizoramah tunah hian Covid-19 hri kai 1 enkawl mek a ni.

Health department hnuai a integrated disease surveillance programme (IDSP) hotute hnen atanga Akashvani Aizawl- thu dawn danin ni tam tak Covid hri kai hmuhchhuah a awm tawh loh hnu-ah kar kal ta Thawhlehi (September ni 16) khan Covid hri kai 1 chu Aizawl district-ah hmuhchhuah a ni a, enkawl mek a ni a, a dinhmun a ngaihtuahawm loh niin an sawi. Nimin, Inrinni khan Covid hri kai ni a rinhlehi mi 22 sample endik a ni a, hri kai hmuhchhuah an awm lo ani.

Kum 2020 bul lama Covid hri lengin ram chhung a rawn thlen atang khan Mizoramah Covid hri kai inringhlel mi nuai 19, sing 9, sang 8 leh 60 sample endik a ni tawh a. An zinga mi nuai 2, sing 3, sang 9 leh 675 in Covid hri an kai tih hmuhchhuah a ni a. Covid avanga thi mi 734 an awm ani.

<><><>

NH

Aizawl leh Silchar inkar kawngpui, a bikin Sairang leh Kawnpui inkar kawng chhe zual siam that tawh chu tunah hian a chhe leh tawh hle.

Kawng hi a chhiat leh nasat tawh em avangin Assam/Kolasib lam pan truck ruak chhuah thlak tam ber chu kawng nalah an tang zel a. Lei laihna khawlin a nawr chhuah zel a ngai thin ani. Ningani atang khan truck ruak an chhuah ngam ta rih lo a, kawng nal tawh lek a ruah a tlak thin vang nia sawiin, hei bakah hian Kolasib Division PWD excavator pakhat chu Ningani lamah court order anga hren a nih leh bawh si avangin duh angin a ruak tlan tir hi a ngamawm loh nia an sawi a ni. Tukin dar 8 leh a chanve atanga chhiara darkar 24 chhung khan Khamrang a Assam/Kolasib pan tur lirthei tangkhang zat hi 264 a ni a, Aizawl lam pan Kawnpui khua a tangkhang zat 339 niin a vai a truck tangkhang hi a vaiin 603 a ni a. He tih lai vek hian Kawnpui atanga Aizawl lam pan truck chhuah a awm lova, Sairang peng leh Mualkhang/Khamrang inkar a tangkhang Assam/Kolasib lam pan 530 chhuah a ni thung a ni.

<><><>